



夢澤集卷之十三

文

務輯

昔大盜之起也權地之要置戍焉故武定亦兵備盜
平議者曰尚奚恃是而今擁乎汰之茲其故卒負悍
弗縻退無以業弗帖于里齊民威之守臣恐請曰願
得重臣者之鎮之也

上命御史王某往焉曰余一人弗重吝汝以捍茲土
惟茲有衆汝寔能庇俾無悸無失厥恒余一人無愆
于茲土寔汝左右同在朕側御史行有言之曰子也

釋近職而事於茲

天子亦不子斬而使馬子於

天子石也石不自唱以惠諸人豈毒之乎夫悉

上之意而務布之俾淑者仗焉而逆者悔臣之良也

茲行也兵之乎抑與輯也兵之匪仁豈

天子意卒而務輯焉負罪之民語之曰吾不兵而汝

輯其誰信然則茲土之民何賴焉且夫悍卒弗試而

弗能生釀焉而盜悍亦材也豈易克也務克者不昭

其棄悍而負罪昭棄示之彼懼不免其何不至是之

謂益其奮而固其黨何克之能爲子也其務信撫密

內而踈形以弛其志非大不淑獲以免以解其從茲

衆也且以捍茲土又何患焉夫禦患者究其由作而

權其術鮮不集矣齊民之謠曰麓有虎狼咆哮如狂

碩人禦之爪牙弗張麓無駭獸惟碩人之良予也豈

以不克懼子

卽卑

詹生貲而官人曰詹生才汝遂汝業俟汝叙豈不汝

顯庸星史下秩也矧其貲獲才者卽汚予惑焉不然

譬美媛焉乃弗蒙大垢翳其妍用無以憎士則病者

乎詹生曰敢謂才然聞之矣聖哲柄世倣儻協謀亦

惟是身之美而權之以享于天下無所浮衆曰彼利我享茲重秩其宜夫是用能終食而免戾匪是而享予朝夕懼其覆也予偃仰焉而卽茲秩且懼浮其何敢侈亦曰得予分也敢謂才君子曰違哉詹生之言混世者以全真也昭潔者以標疾也必矣才而卑且曰分也濁其迹美其衷吾於詹生知免矣

先禮

劉子節推楊州夢澤子謂之曰夫楊侈區也財侈斯用侈用侈斯情侈情侈斯爭侈爭侈斯獄侈侈而理者難焉吾終告子賄於勢而令之屏其不度也必

恃也恃而不度法爲撓矣夫法善者恃也善而失恃恣不度也勢覆豪法病善民何賴焉然則執之難翳詐而伺詐狀若愚伏強而攻強疑於怯然則昭之難務執也務昭也曰匪刑其可刑叔世尚也淫刑而逞淑慝偕感雖獲焉末矣然則仁之難三者難於非人者也君子弗難焉予豈患子若夫擇隙而肆意弗臧也在法無名莫能罪之務執者且惠緣督也度上之逆反情以投務昭者且惠巧中也不刑以臨怙惡所利豈能得其不忍蔽而與息乎務仁者且惠頑衆也是君子之所患也子其圖之抑聞之刑禮之弼也禮

以開民閉而且越刑加焉侈者越禮禮之不立而侈是刑是毀開焉而治其越無濟之事矣子其先禮

遐致

望雲之什壽詹母也孰為之詹母之子暨詹母之子之友為之也孰倡之詹子倡之孰和之其友和之也曷為乎倡也曰詹子如京師適其母夫人誕也則曰跪而觴惟我孟我季侑而幣惟我一二媼姪暨我里孺而嬉以娛惟我從子則又曰我先君子逝惟我母氏母氏耄矣能幾誕而茲弗能觴也且我童而業茲艾矣弗能官也用憂我母氏矧未撫我嗣息於是泣

而賦賦者何賦其感也然則衆和也何感同也感何以同均人子焉有弗感者無親也曷為乎雲而望也曰燕楚之不逮匪朝夕達也彼雲之悠然倏忽而燕楚可也望而思庶與倏忽乎其感也何以祝曰錫我母氏脩筭松若栢若及我官而康純嘏是膺嶽若河海若其固有旣繁我胤芝若蕙若茁而秀無折然則孰聽之曰天聽之曷為乎天且聽焉曰至誠動天

正復

斬指揮李氏某惟厥先有顯庸授茲秩暨厥祖會荆難免戍于邊終焉濫坐也父早世君童仲父立撫之

曰嗟哉先世之勲而弗享也非罪之坐而不務去予病焉悉狀焉請

上憐之命有司復其官旋累援者再免衆曰茲已矣乃仲父益力請如初再復賀者曰仆而起再仆再起惟汝仲父良艱而濟惟汝先世勲實腆足庇焉是故神實嘉而宥豈專人之圖惟汝有淑質用能疑其先澤更祝焉曰繫自茲迨其末裔無咎王子曰茲里言也予不欲侈予言其大夫法國之衡也而欲焉其不行矣無故勢者竊之以恐衆巧者奸之以完軀于是乎不恃正則而期以賄成將萬無覆也君子且不欲

矧不終免茲辱之大者何侈焉子之請也予不聞地者誰而竟以濟是唯

天子鑒其情有司正其濫法之不欲予是爲國侈其何暇私李氏然聞之以正獲者不覆雖覆可無罪無罪而覆猶未覆也李氏之慶莫大於是予以是賀

良振

夔之進士業者曰匪人茲土之靈實閔夫靈人之乘也闖茸獲乘奮無難焉乘之弗強良且蹶矣不然夔豈無良馬而父汨汨也其何忍重忝夔之士俾弗醜於四方史占之曰吉其將復是謂嶽扃其英澤絨其

精闡於既盈群士其升乃公乃卿乃今而後莫之與
京明年吳子厭之焉夔之人曰史言然靈實啓之豈
專吳子良王子曰不可其何以賢哲之務而令史者
神焉靈之啓人歟人之啓靈也夫君子勤其德業而
侯焉惟已之足恃譬農夫之力畝暇問豐凶是神且
聽於我其安聽神夫德澤之基也業取之藉也非德
非業靈安助之夫鄙者實弗飭辭曰是靈之閔也用
善其劣幸者淫祉假神以侈其何崇誕以滋俗也夔
之士其務武吳子耶是惟德業之務肖焉將弗舉可
也舉而弗吳子用愧焉其無曰靈之啓也以病談者

歸故

吳子令遂安王子曰遂安往稱儉而淳茲不然矣羨
者階侈不守於閑而欲務濟奸國之憲以賈戾而嘗
其軀犯而能竊上用翳焉諺謂賢也夫儉刑侈者也
詐讐淳者也是唯勢丘澤不若也而卒以及何居令
者謀促恃其不越而弛度以臨不虞後至氣蕩其真
及於侵淫彼其宿昔之釀而一朝逞焉其患且倍譬
不隄而咎其決曷可免矣且夫聖哲權世明察濟偏
齷齪守故寸魚之罟施之鯨鯢裂網毀紀無難焉轍
淪矣驅車而循豈御之得不溺往聽而與更圖濟之

道也抑聞之旅在達而迷指之其室而令之歸邑之
舊也子務歸之而已故崇實抑華滋其蔭也脩軌辨
物閉其恣也樹惠伐頑昭其向也明德揭典衛其侵
也然而不復者否也且子贍而鮮嗜通而不欬峻而
寡爭儉而淳子之有也布子之有而舊是復何憚於
遂安

仁理

齊魯之民寃於理錢子往焉人曰錢子請法而明文
移以其優蔑弗獲矣予曰信然民且重寃何能獲焉
雖獲必亂夫憫寃而使也亦唯昭其怨思而務求百

一之生以畀焉豈其顛越而因以執之也不然授之
民命而今嘗其術譬驅利獸而內之囿俾搏且噬焉
其無乃非仁人之意也乎夫矜諳者不度恃明者不
疑不度不疑其何以獲彼耻不獲而務逞焉民且斃
矣無故悅而意舍之憎而意繫之上下其真而文法
之務就蠢蠢之民曷能與知故慘刻之聲哲人惡之
驚悍之吏聖王必戮狼戾之長庶氓感焉且夫滯法
者情遺情遺法亦弊任文者實病實病文爲虛是我
且爲桔其能臨民茲役也寔唯憫寃之故亦曰試之
矣知其仁仁能度能疑明斷生焉庶其有獲若曰文

法一獄史辦之矣豈以待錢子

囚貧

正齋先生往治山東之賦先生曰茲土貧而務徵焉
艱哉王子曰夫貧乃無患矣吾聞之舍玉孕珍山乃
穴甘鱗巨介澤以肆旣植也可材衡虞困焉羽毛中
飾肉中豆獵子必求麗綺緻紈織人弗食故沃者速
硯豐者致約蓄者誨取區以富聞民乃禍焉嗟哉今
之世不法而誅四國病矣茲土後匪貧曷免豈天實
嗇之弗以禍也故鮮利之區天之宥也是故茲行也
弗艱者四焉一曰儉斯淳淳斯度度斯理二曰無慮

賄三曰計之不煩四曰可訓勤焉夫貧首四國而誅
後焉旣利矣先生其毋務腆殖之俾以富聞天之所
宥先生其忍禍焉先生曰子言激哉貧而幸之曷可
說矣

居謫

西渠先生謫且行有問於予者曰先生樂乎曰否曰
戚乎曰然曰獲戾以貞犯衆之忌有是節也終吾身
恃矣蹶而虞一厄沮喪意免而值者則然先生豈有
是焉予曰否夫舉國之憲者期必濟也而弗濟焉雖
弗懾抑豈其願其曰將以獲戾而成吾恃焉是利弗

濟也夫憲天下之紀也舉之弗濟憲且墮焉墮國之
憲而崇吾節然且利之其不可矣且黜身非辱寵道
為榮榮辱之端君子審焉豈身黜是虞道用抑焉是
戚夫有敵而伺吾吾惟弗攻攻之不克敵且張矣故
擊惡者必斃不斃藉其恣也吾節務成而貽惡以藉
憂其在茲夫虞蹶而戒者怯也幸弗濟以昭吾節視
怯均焉先生其能樂之

訓立

吳先生名山宅之陰有山峙焉三峯而中峭若立先
生曰是愜吾衷以號焉曰立齋予乃序曰夫飭躬蹈

世者莫如立矣夫唯立是謂道根道根是謂物宰物
宰乃克克乃不拔不拔之謂能求存求存者純是故
豐侈情約悴志幽惑智紛亂思重撼守夫五者之謂
物交物交者吾以觀吾立立迺克不立迺不克不克
者亡夫道或戚或敵或主或隸或局或闕戚其良敵
弗張為群物疆衆物之疆備之弗忘主於一隸乃役
為群物辟群物之辟乃登無極局而持闕惟時為群
物機群物之機握之不違夫是之謂能立能立者豐
莫侈約莫悴幽莫惑紛莫亂重莫撼夫是謂物莫之
克夫率者不擇不擇者執妄弱者不固不固者淪邪

的曰明守固曰貞貞且明為立之根立之根是為
之衛辟之翊機之門不然且愧茲山

勗審

袁子令邾王子曰邾之治子必優焉吾不贊子優勗
子以審夫車以載無弗勝也不脂轄不行泥也利刃
日刺無鋒竭也群孺之嬉屢叱之弗畏或以侮威瀆
也寇入室燭之寇匿用其明也勇夫不戒僵於虺易
虺也故忌通者速滯亡蓄者取窮懈衆者啓頑悉情
者誨姦怙勁者基折故固戶利樞無弗通矣隄之始
決無弗濟矣雷霆卒然無弗震矣衆躁靜觀無弗昭

矣強力疾形無弗什矣茲行也予於子憂不通不憂
不執憂不蓄不憂不敷憂不輯不憂不威憂不晦不
憂不明憂不襲不憂不力

神難

予獄既久請于神曰蓋聞之洞舛者靈也贊貞者天
也故哲領不折妖體必離亂魄見褫歆衷每迷故刺
聖之刃必斷毒賢之鳩必覆掩正之網必裂墮良之
穽必夷是神職也予之獄也奚罪待命移時倦肢憤
志恍兮忽兮聆神之難一難曰醜士愆妍脩夫短譽
東家之宴西隣怨詛是故握珠懷珍而贊瓦礫彼有

跋鼈稱之馱馱鄰姬之瞽而曰是則明眸汝也蒙垢
在伊讓其不滌彼髮不括若已蓬首是瞽鄰姬明跋
鼈而擲瓦礫也汝奚無罪予曰天之界子厥鑑湛湛
乃緇其素說中以容則予豈敢予不知罪二難曰據
崇者卑附操首者尾隨宅腴者瘠依言勢忌失也虎
豹違山見威於犬悍夫不戒或孺襲馬驚折其翼而
鳶啄腹汝乃捐華背要而昔心不移夫舍陵趨壑誨
擠者也去重卽輕勗擲者也服冕不則命裂者也于
失勢矣固昔憎所乘而往怨所便也汝奚無罪予曰
勢若龍蛇誰與執之且棄吐若疾掩耳冒言貪主人

之利而憚進苦劑予未能也予不知罪三難曰虎搏
鄰牛操弧弗射非已利也虞人布羅獲禽立若見者
弗禁有在野也雙腹可飽忍割朋肉痛弗切膚也故
攘鄰之膏以赴盜火庇已而已子則塞勢者之賄奪
肥乎大嚼之口而飼之人貽國人以富而甘以其身
賈戾夫存鄰牛而射虎逢虎之怒惡禽斃而毀虞羅
遭虞之疾是眩者爲也汝奚無罪予曰梟搏雞雛其
毋奮翅知不能庇愛弗已也夫聞啼助戮良所弗忍
予不知罪四難曰衆直頌行不勝單佞十堯崇治一
桀潰之點夫伸舌惠口是屈故堅榦不伐決漲不遏

鑠焰不撲族骨不解奔颯不障虞反傷也而子務勁者之摧而辱士之庇汝奚無罪予曰吾寧吾步之蹶誠不能使勁者之肉辱也且覆惡以求立也德強以避抑也曷可說矣予不知罪五難曰不拔之道存乎托也衆植其援以備攻也王屋之鳥弋人弗射皇圖之兔獵子不逐集瓚之蠅忍而弗擲若木之條引手莫牽賞莢生陛弗剪弗踐其附然也故陽區無凍蟲仁壤無稿品潤國無燥類附之及也子膚托而子援矣汝奚無罪予曰予聞之律夫終日立不倚不僵衆恃而不休非夫也予不知罪六難曰世有尊官莫知

其名手握雷電奔轟閃耀旭昇倏忽殊態改視僂僕而趨償以最考唯唯將事是爲豐績磬折之腰壽其文組如醴之輔願祿是求故勁項者辱剛膝者斥毅面者黜符中者完既泄之孔忤臆者扇不薪之焰是天下之至威也汝乃規守矩執恭不踰憲不省已倨咎人之階茲構之由也何謂無罪哉何謂無罪哉予乃俯伏嘆息茫然汗洽駭然股慄厥罪自知無復以對神不復難

基進

石泉閭而邃宜業沃也宜田宜木坎而澤宜漁萃諸

騷馬宜娛以憇蕭子宮之以命馬曰石泉子人曰務趨者不假恬耽進者不媒退志舉者不藉伏致章者不倚真故于霄之木弗綴欹岑振雲之翼子叢靡戢靈鮪不宅潦珍綺之鬻也忌貧里是故以寂求聞惡弗聞者道之左也却步矣謂弗退卽者術之乖也蒙重疾沉者願之反也子其試矣豈其悅試而違念以階蕭子曰否夫金革之韻宅於虛大輿稅轄脂以俟乘弛弛也以勁張利刃必衣故不退者不進不恬者不趨不伏者不舉不真者不章故儉取之庫每盈不市之珍族構萬金美媛不窺戶君子求焉競首據腴

鮮不逢抑子疑子乎予茲試矣

仁撫

李中丞撫遼東王子曰夫遼夷障也亦以障吾區也夫惡越者垣馬求弗能越也戒越可越滋越也求弗伺也以無隙揭隙以示伺是疾馬爲誨之矣故自障者障夷也不然以藉也其能障夫障虞遐昭隱則知良摧強襲悍則勇良奮將激卒則信良奴知隸勇君信則仁良故仁衆之附也知之府也勇之地也信之圍也夫子之往也其務仁之乎仁吾區而已豈夷是仁夷也其曷可斃盡矣無務斃之務殖之殖彼利弗

吾斃也譬虎也備而已無或怒其安噬悍夫馬格而斃之或以傷以傷者下也格而斃之者中也無怒者上也豈虎是仁仁吾驅馬耳矣是故以戰戰不若以無戰戰以勝勝不若以無勝勝豐而已之不若無豐一仆不若衆植故仁人讐功無功之功曷可尚矣是障之道也故曰自障者障夷也夫河洛罔不仁夫子茲往也羗夷之氓其河洛矣且夫改轍而馳不易其御乘之良也然難矣難裕本也茲役也其以難夫子而裕之乎

夢澤集卷之十三

